



ԱՐԺԱՆԱՊԱՏԻՎ Տ. ՀՈՎՀԱՆՆԵՍ ՔԱՀԱՆԱ ԴԱՆԻԵԼՅԱՆ

Հոկտեմբերի 20-ին, կիրակի օր, Թբիլիսիի հայոց Ս. Գևորգ եկեղեցում քահանա ձեռնադրվեց բարեշնորհ Հովհաննես սարկավազ Դանիելյանը, գերաշնորհ Տ. Մամբրե արքեպիսկոպոս Գալֆայանի շնորհաբաշխությամբ:

Արժանապատիվ Տ. Հովհաննես քահանա Դանիելյանը ծնվել է 1932 թվականին Լեւինականում: Նրա ծնողները 1915 թվականին գաղթել են Մուշից և հաստատվել Հայրենիքում:

1939 թվականին Հովհաննեսը իր ծնողների հետ տեղափոխվում է Թբիլիսի, ուր և ստանում է իր նախնական կրթությունը: 1948 թվականին ավարտելով միջնակարգ դպրոցի 8-րդ դասարանը անցնում է աշխատանքի:

Հովհաննեսը վաղ պատանեկան տարիքից սեր է ունեցել դեպի քահանայական սուրբ ասպարեզը:

1953 թվականին նա ընդունվում է Հոգեվոր Ճեմարան՝ իր ուսումը շարունակելու և հոգեդրական դասնալու հաստատ որոշումով:

Հովհաննեսը Ճեմարանում շատ լավ է սովորում, խորանում է գիտելիքների մեջ և իր ազնիվ վարք ու բարքով, ջանասիրությամբ և համեստությամբ գրավում է բոլորի համակրանքը:

1954 թվականի փետրվարին նա ստանում է դպրության չորս աստիճանները, իսկ 1955 թվականի դեկտեմբերին ձեռնադրվում է սարկավազ: Նա իր ուսումը շարունակում է Հոգեվոր Ճեմարանի լսարանական բաժնում մինչև 1957 թվականի ուսումնական տարվա վախճանը:

Վեհափառ Հայրապետի կարգադրությամբ և հրամանով 1957 թվականի հոկ-



տեմբերի 20-ին նա ձեռնադրվում է քահանա:

Արժանապատիվ Տ. Հովհաննես քահանա Դանիելյանը մեր Ճեմարանի լավագույն ուսանողներից մեկն է, պատրաստված, ազնիվ, համեստ, հավատավոր և անձնվիր:

Նորընծա Տ. Հովհաննես քահանայագործելու է Թբիլիսիի Ս. Գևորգ եկեղեցում:

Շնորհավորելով նորընծային, ցանկանում ենք նրան միաժամանակ արդյունավետ գործունեություն իր նոր ասպարեզում՝ հօգուտ մեր Ս. Եկեղեցու և ի մխիթարություն հայ հավատացյալ ժողովրդի:

